

SAMÞYKKT

um búfjárhald í Mýrdalshreppi.

1. gr.

Markmið og gildissvið.

Samþykkt þessi er sett til að tryggja skipulag, stjórn og eftirlit með búfjárhaldi í Mýrdalshreppi, koma í veg fyrir ágang á lóðir íbúanna og vernda gróður í sveitarfélaginu.

Sveitarstjórn getur falið landbúnaðarnefnd framkvæmd málaflöksins.

2. gr.

Takmörkun á búfjárhaldi og leyfisveitingar.

Búfjárhald (nautgripa, hrossa, svína, sauðfjár, kanína, geitfjár og alifugla) er óheimilt utan lögbýla í Mýrdalshreppi án leyfis sveitarstjórnar. Sá sem stunda vill búfjárhald utan lögbýla sbr. 2. gr., skal senda skriflega umsókn til sveitarstjórnar. Í umsókninni skal gera grein fyrir fjölda búfjár sem halda skal, aðbúnaði og öðru, sem máli kann að skipta um öryggi þess og vörslu.

Telji sveitarstjórn að umsækjandi uppfylli skilyrði skv. 3. gr., veitir hún leyfi til búfjárhalds. Leyfisveiting búfjárhalds skuldbindur þó ekki Mýrdalshrepp til að sjá búfjáreigendum fyrir beitilandi, hagagöngu eða slægjum handa búfé né veita þeim aðra aðstöðu til búfjárhalds.

Leyfi til búfjárhalds er veitt til ákveðins tíma en er uppsegjanlegt með eins árs fyrirvara miða við 15. júní ár hvert. Samþykkið er háð gildandi lögum og reglum um búfjárhald eins og þær eru á hverjum tíma og er gefið út á nafn og er ekki framseljanlegt. Sá sem fær leyfi til búfjárhalds samkvæmt samþykkt þessari skal hafa búféð í öruggri vörslu og ber hann að öllu leyti ábyrgð á því.

Hafi búfjáreigandi gerst sekur um illa meðferð á búfé, skal hann sviptur leyfi til búfjárhalds.

3. gr.

Skilyrði til búfjárhalds.

Eigandi búfjár skal hafa fyrir það hús sem samræmist gildandi reglugerðum um aðbúnað búfjár eða annars góðum búskaparháttum að mati sveitarstjórnar. Sama gildir um allt umhverfi húsanna.

Eigandi búfjár skal hafa fyrir það beitiland og fóður og tryggja góða meðferð þess.

Gangi búfé úti á vetrarþeir, skal eigandi eða umráðamaður þess ábyrgjast nægilegt fóður, viðunandi skjól og örugga vörslu.

Byggingar gripahúsa eru einungis leyfðar á svæðum sem skipulögð eru fyrir búfjárhald. Þau gripahús sem fyrir eru í sveitarfélaginu utan bújarða og svæða sem eru ætluð til búfjárhalds samkvæmt aðalskipulagi, skulu fjarlægð þegar sveitarstjórn ákveður slíkt, með eins árs fyrirvara. Óheimilt er að byggja við þau, endurnýja eða endurbyggja.

4. gr.

Auðkenning og merking búfjár.

Búfjáreigendum er skylt að merkja allan fénað, hvort sem um er að ræða sauðfé, hross, nautgripa o.s.frv. samkvæmt reglugerð um búfjármörk, markaskrár og takmörkun á sammerkningum búfjár nr. 200/1998, með breytingum nr. 30/2000 og 221/2002 og reglugerð um merkningar búfjár nr. 463/2003.

5. gr.

Varsla búfjár, þar með bann við lausagöngu og ákvæði um beitolönd.

Lausaganga búfjár er bönnuð á eftirtöldum svæðum:

- Innan skógræktar- og landgræðslusvæðis umhverfis þéttbýlið í Vík. Svæðið afmarkast af austurbrúnum Reynisfjalls að Fremra-Grafarhöfði, þaðan um girðingu austur um Lindarhóla og upp í Hrafnatinda. Frá Hrafnatindum með vestur- og suðurbrúnum Víkurheiðar að Uxafótarlæk og með Uxafótarlæk allt til sjávar.
- Innan veggirðingar með hringvegi (1) frá Vík að sýslumörkum við Jökulsárlón á Sólheimasandi.

Umráðamaður lands skal fyrir 15. júní á hverju vori framvísa til sveitarstjórnar umsögn búnaðarsambands um að vörslulína sé fullnægjandi.

Komist búfé inn á friðað svæði skal umráðamaður lands ábyrgjast handsömun þess og koma því í örugga vörslu í samræmi við 9. gr. búfjárhaldslaga. Enn fremur geta þeir sem fyrir ágangi verða, látið handsama ágangsfénað og skulu þeir tilkynna sveitarstjóra um hann tafarlaust.

Búfjáreigendum er heimilt að reka búfé sitt um friðuð svæði sbr. 1. mgr. 5. gr. með leyfi umráðamanns lands enda, sé ávallt tryggt að hæfilegur fjöldi gæslumanna sé til staðar til að tryggja að búfé sleppi ekki úr vörslu eigenda búfjárins.

Þar sem reka þarf búfé yfir veg til beitar með reglubundnum hætti, skal veghaldari sjá til þess að tilhlýðilegar merkingar séu til staðar, vegfarendum til aðvörunar.

Sveitarstjórn heldur skrá yfir lönd í eigu sveitarfélagsins, sem leigð eru til beitar og/eða slægna. Umsóknir um land til beitar eða slægna, skal senda til sveitarstjóra sem úthlutar landi samkvæmt tillögu landbúnaðarnefndar.

Einstaklingar og félög búfjáreigenda, sem hafa lönd í eigu sveitarfélagsins á leigu til beitar eða slægna, skulu leitast við að viðhalda gróðri landsins og efla hann, meðal annars með árlegri áburðargjöf. Í leigusamningi fyrir beiti- og slægjulönd eru tilgreindar umgengnisreglur um landið.

6. gr.

Viðurlög við brotum gegn samþykktinni.

Brot gegn samþykkt þessari varða sektum. Með mál út af brotum skal farið að hætti opinberra mála skv. 18. gr. laga um búfjárhald o.fl. nr. 103/2002, með síðari breytingum.

7. gr.

Samþykkt og gildistaka.

Samþykkt þessi sem samin er og samþykkt af sveitarstjórn Mýrdalshrepps, staðfestist hér með samkvæmt lögum nr. 103/2002, um búfjárhald o.fl. með síðari breytingum, til þess að öðlast þegar gildi og birtast til eftirbreytni öllum þeim sem hlut eiga að máli.

Landbúnaðarráðuneytinu, 4. maí 2004.

Guðni Ágústsson.

Atli Már Ingólfsson.